

李翰林集卷第十八

翰林供奉李白

遊宴

春陪楊江寧及諸官宴北湖感古



秋獵孟諸夜歸置酒單父東樓觀妓

在水軍宴韋司馬樓船觀妓

宴鄭叅卿山池

遊謝氏山亭

待酒不至

邯鄲南亭觀妓



把酒問月

秋浦清溪雪夜對酒客有唱鷓鴣者

楚江黃龍磯南宴楊執戟治樓

下終南山過斛斯山人置酒

獨酌

九日龍山飲

春日遊羅敷潭

流夜郎至江夏陪長史叔及薛明府宴興德寺

月下獨酌四首 宴陶家亭子

春日獨酌

攜妓登梁王栖霞山孟氏桃園中

銅官山醉後絕句

陪侍郎叔遊洞庭醉後三首

秋浦與周生宴青溪玉鏡潭

與從姪杭州刺史良遊天竺寺

遊南陽白水登石激作

同族姪評事黯遊昌禪師山池二首

遊太山六首

與南陵常贊府遊五松山

春陪商州裴使君遊石娥溪

金陵鳳皇臺置酒

焦香山望松寥山



春日獨酌

對酒醉題屈突明府廳

金陵江上遇蓬池隱者

朝王歷陽不肯飲酒

與史郎中飲聽黃鶴樓上吹笛

對酒

同友人舟行遊台越作

遊水西簡鄭明府

九日

九月十日即事

九日登山

宴陶家亭子

春日遊羅浮潭

秋夜與劉碭山泛宴喜亭池

泛沔州城南郎官湖

春陪楊江寧及諸官宴北湖感古

昔聞顏光祿攀龍宴京湖樓船入天鏡  
帳殿開雲衢  
君王歌大風如樂豐沛都  
延年獻嘉作  
邈與詩人俱  
我來不及此  
獨立鍾山孤  
揚宰穆清  
颯芳聲  
騰海隅  
英睿滿四座  
繁若瓊林敷  
鷓首弄倒景  
蛾眉綴明珠  
新絃採梨園  
古舞嬌吳歛  
曲度繞雲漢  
聽者皆歡娛  
雞棲何嘈嘈  
汎月沸笙竽  
古之帝宮苑  
今乃人樵蘇  
感此勸一觴  
願君覆瓢壺  
榮盛當作樂  
無令後賢吁  
秋獵孟諸夜  
歸置酒單父東  
樓觀妓  
傾暉速短炬  
走海無停川  
冥飡圓丘草  
欲以還顏年



此事不可得微生若浮煙駿發跨名駒雕弓控鳴弦  
鷹豪魯草白狐兔多肥鮮邀遮相馳逐遂出城東田  
一掃四野空喧呼鞍馬前歸來獻所獲炮灸宜霜天  
出舞兩美人飄飄若雲仙留歡不知疲清曉方來旋  
在水軍宴韋司馬樓船觀妓

搖曳帆在空清流順歸風詩因鼓吹發酒為劍歌雄  
對舞青樓妓雙鬟白玉一作童行雲且莫去留醉楚

王宮

宴鄭叅卿山池

爾恐碧草晚我畏朱顏移愁看楊花飛置酒正相宜  
歌聲送落日舞影迴清池今夕不盡盃留歡更邀誰

遊謝氏山亭

淪老卧江海再歡天地清病閑久寂寞歲物徒芬榮  
借君西池遊聊以散我情掃雪松下去捫蘿石道行  
謝公池塘上春草颺已生花枝拂人來山鳥向我鳴  
田家有美酒落日與之傾醉罷弄歸月遙欣稚子迎  
待酒不至

玉壺繫青絲沽酒來何遲山花向我笑正好銜盃時  
晚酌東窻下流鶯復在茲春風與醉客今日乃相宜  
鄴鄆南亭觀妓



歌鼓燕趙兒魏姝弄鳴絲粉色艷日彩舞袖拂花枝  
把酒領美人請歌邯鄲詞清箏何繚繞曲度綠雲垂  
平原君安在科斗生古池座客三千人于今知有誰  
我輩不作樂但為後代悲

把酒問月

故人賈淳  
令余問之

青天有月來幾時我今停盃一問之人攀明月不可  
得月行却與人相隨皎如飛鏡臨丹闕綠煙滅盡清  
暉發但見宵從海上來寧知曉向雲間沒白兔搗藥  
秋復春姮娥孤栖與誰隣今人不見古時月今月曾  
經照古人古人今人若流水共看明月皆如此唯願  
當歌對酒時月光長照金樽裏

秋浦清溪雪夜對酒客有唱鷓鴣者

披君貂襜褕對君白玉壺雪花酒上滅頓覺夜寒無  
客有桂陽至能吟山鷓鴣清風動窻竹越鳥起相呼  
持此足為樂何煩笙與竽

楚江黃龍磯南宴揚執戟治樓

五月分五洲碧山對青樓故人揚執戟春賞楚江流  
一見醉漂月三杯歌棹謳桂枝攀不盡他日更相求

下終南山過斛斯山人置酒

暮從碧山下山月隨人歸却顧所來徑蒼蒼橫翠微



相攜及田家童稚開荆扉綠竹入幽援青蘿拂行衣  
歡言得所憩美酒聊共揮長歌吟松風曲盡河星稀  
我醉君復樂陶然共忘機

獨酌

春草如有意羅生玉堂陰東風吹愁來白髮坐相侵  
獨酌勸孤影開歌面芳林長松爾何知蕭瑟為誰吟  
手舞石上月膝橫花間琴過此一壺外悠悠非我心

九日龍山飲

九日龍山飲黃花笑逐臣醉看風落帽舞愛月留人  
流夜郎至江夏陪長史叔及薛明府宴興

德寺作

紺殿橫崖一作上青山落鏡中岸迴沙不盡日映水  
成空天樂流香閣蓮舟颺晚風恭陪竹林宴留醉與陶公  
月下獨酌四首

花下一作一壺酒獨酌無相親舉一作盃邀明月對

影成三人月既不解飲影徒隨我身暫伴月將影行  
樂須及春我歌月徘徊我舞影凌亂醒時同交歡醉  
後各分散永結無情遊相期邈雲漢

天若不愛酒酒星不在天地若不愛酒地應無酒泉  
天地既愛酒愛酒不愧天已聞清比聖復道濁如賢



賢聖既已飲何必求神仙一本無三四句三五通大道一斗合自然但得醉中趣勿為醒者傳

三月咸陽時千花晝如錦誰能春獨愁對此徑須飲窮通與脩短造化夙所稟一樽齊死生萬事固難審醉後失天地兀然就孤枕不知有吾身此樂最為甚窮愁千萬端美酒三百盃愁多酒雖少酒傾愁不來所以知酒聖酒酣心自開辭粟餓首陽屢空飢顏回當代不樂飲虛名安用哉蟹螯即金液糟丘是蓬萊且須飲美酒乘月醉高臺

宴陶家亭子

曲巷幽人宅高門大士家池開照瞻鏡林吐破顏花綠水葺春日青軒祕晚霞若聞絃管妙金谷不能誇

春日遊羅浮潭

行歌入谷口路盡無人躋攀崖度絕壑弄水尋迴溪雲從石上起客到花間迷淹留未盡興日落羣峯西

春日獨酌

東風扇淑氣水本滌春暉白日照綠草落花散且飛孤雲還空山衆鳥各已歸彼物皆有託吾生獨無依



對此石上月長歌醉芳菲

攜妓登梁王栖霞山孟氏桃園中

碧草已滿地柳與梅爭春謝公自有東山妓金屏笑  
坐如花人今日非昨日明日還復來白髮對綠酒彊  
歌心已摧君不見梁王池上月昔照梁王樽酒中梁  
王已去明月在黃鸝愁醉啼春風分明感激眼前事  
莫惜醉卧桃園東

銅官山醉後絕句

我愛銅官樂千年未擬還要須迴舞袖拂盡五松山

陪侍郎叔遊洞庭醉後三首

今日竹林宴我家賢侍郎三盃容小阮醉後發清狂

又

船上齊橈樂湖心泛月歸白鷗閑不去爭拂酒筵飛

又

剗却君山好平鋪湘水流巴陵無限酒醉殺洞庭秋

秋浦與周生宴青溪玉鏡潭

康樂上官去永嘉遊石門江亭有孤嶼千載跡猶存  
我來憩秋浦三八桃陂源一作千峯照積雪萬壑盡

啼猿興與謝公合文因周子論掃崖去落葉席月開  
清罇溪當大樓南溪水正南奔迴作玉鏡潭澄明洗



心魂此中得佳境可以絕囂喧清夜方歸來酣歌出  
平原別後無此兆一作經為謝樹蘭孫

與從姪杭州刺史良遊天竺寺

掛席凌蓬丘觀濤憩樟樓三山動逸興五馬同遨遊  
天竺森在眼松門颯驚秋覽雲測變化弄水窮清幽  
疊嶂隔遙海當軒寫歸流詩成傲雲月佳趣滿吳洲

遊南陽白水登石激作

朝涉白水源暫與人俗踈島嶼佳境色江天涵清虛  
目遠去海雲心閑遊川魚長歌盡落日乘月歸田廬

同族姪評事黯遊昌禪師山池一首

遠公愛康樂為我開禪關蕭然松石下何異清涼山  
花將色不染水與心俱閑一坐度小劫觀空天地間

客來花雨際秋水落金池片石寒青錦踈楊挂絲絲  
高僧拂玉柄童子獻霜梨惜去愛佳景煙蘿欲暝時

遊太山六首

四月上太山石平御道開六龍過萬壑澗谷隨縈迴  
馬跡遠碧峯于今滿青苔飛流灑絕壑水急松聲哀  
北眺寧嶂奇傾崖向東摧洞門閉石扉地底興雲雷  
登高望蓬瀛想像金銀臺天門一長嘯萬里清風來  
玉女四五人飄飄下九垓含笑引素手遺我流霞盃



稽首再拜之自媿非仙才曠然小宇宙弃世何悠哉

酒洞一作洞門

清曉騎白鹿直上天門山山際逢羽人方瞳好容顏  
捫蘿欲就語却掩青雲關遺我鳥跡書飄然落巖間  
其字乃上古讀之了不閑感此三歎息從師方未還

平明登日觀舉手開雲關精神四飛揚如出天地間  
黃河從西來窈窕入遠山憑崖覽八極目盡長空閑  
偶然值青童綠髮雙雲鬢笑我晚學仙蹉跎凋朱顏  
躊躇忽不見浩蕩難追攀

清齋三千日裂素寫道經吟誦有所得衆神衛我形  
雲行信長風颭若羽翼生攀崖上日觀伏檻窺東溟  
海色動遠山天雞已先鳴銀臺出倒景白浪翻長鯨  
安得不死藥高飛向蓬瀛

日觀東北傾兩崖夾雙石海水落眼前天光遙空碧  
千峯爭攢叢萬壑絕凌歷緬彼鶴上仙去無雲中跡  
長松入霄漢遠望不盈尺山花異人間五月雪中白  
終當遇安期於此鍊玉液

朝飲王母池暝投天門闕獨抱綠綺琴夜行青山月  
山明月露白夜靜松風歇仙人遊碧峯處處笙歌發  
寂聽娛清輝玉真連翠微想像鸞鳳舞飄飄龍虎衣



捫天摘匏瓜恍惚不憶歸舉手弄清淺誤攀織女機  
明晨坐相失但見五雲飛

與南陵常贊府遊五松山

山有古精舍

安石凌溟渤獨嘯長風還逸韻動海上高情出人間  
靈異可並跡澹然與世閑我來五松下置酒窮躋攀  
徵古絕遺老因名五松山五松何清幽勝境美沃洲  
蕭颯鳴洞壑終年風雨秋響入百泉去聽如三峽流  
剪竹掃夫花且從傲吏遊龍堂若可憩吾欲歸精修

春陪商州裴使君遊石峽溪

時欲東歸遂有此贈

裴公有仙標拔俗數千丈澹蕩滄洲雲飄飄紫霞想  
剖竹商洛間政成心已閑蕭條出世表冥寂閉玄關  
我來屬芳節解榻時相悅褰帷對雲峯揚袂指松雪  
暫出東城邊遂遊西巖前橫天聳翠壁噴壑鳴江一作  
紅泉尋幽殊未歇愛此春光發溪傍饒名花石上有  
好月命駕歸去來露華生綠苔淹留惜將晚復聽清  
猿哀清猿斷人腸遊子思故鄉明發首東路此歡焉  
可忘

金陵鳳皇臺置酒

置酒延落景金陵鳳皇臺長波寫萬古心與雲俱開  
借問徃昔時鳳皇爲誰來鳳皇去已久正當今日迴



明君越義軒天老坐三台豪士無所用彈絃醉金罍  
東風吹山花安可不盡杯六帝沒幽草深宮眞綠苔  
置酒勿復道歌鐘但相催

焦香山望松寥山

一作焦山香望

石壁望松寥宛然在碧霄安得五綵虹架天作長橋  
仙人如愛我舉手來相招

春日獨酌

我有紫霞想緬懷滄洲間且對一壺酒澹然萬事閑  
橫琴倚高松把酒望遠山長空去鳥沒落日孤雲還  
但悲光景晚宿昔成秋顏

對酒醉題屈突明府廳

陶令八十日長歌歸去來故人建昌宰借問幾時迴  
風落吳江雪紛紛入酒杯山翁今已醉舞袖爲君開

金陵江上遇蓬池隱者

時於落星石上以紫綺裘換酒爲歡

心愛名山遊身隨名山遠羅浮麻姑臺此去或未返  
遇君蓬池隱就我石上飯空言不成歡強笑惜日晚  
淶水向鴈關一作門黃雲蔽龍山歎息兩客鳥徘徊吳  
越間一語一執手留連夜將久解我紫綺裘且換金  
陵酒酒來笑復歌興酣樂事多水影弄月色清光奈  
愁何明晨挂帆席離恨滿滄波



朝王歷陽不肯飲酒

地白風色寒雪花大如手笑殺陶淵明不飲盃中酒  
浪撫一張琴虛栽五株柳空負頭上巾吾於爾何有

與史郎中飲聽黃鶴樓上吹笛

一為遷客去長沙西望長安不見家黃鶴樓中吹玉  
笛江城五月落梅花

對酒

勸君莫拒盃春風笑人來桃李如舊識傾花向我開  
流鶯啼碧樹明月窺金罍昨來朱顏子今日白髮催  
棘生石虎殿鹿走姑蘇臺自古帝王宅城闕閉黃埃  
君若不飲酒昔人安在哉

同友人舟行遊台越作

楚臣傷江楓謝客拾海月懷沙去瀟湘挂席泛溟渤  
蹇予訪前跡獨往造窮髮古人不可攀去若浮雲沒  
願言弄倒景從此鍊真骨華頂窺絕冥蓬壺望超忽  
不知青春度但怪綠芳歇空持釣鼈心從此謝魏闕

遊水西簡鄭明府

天宮水西寺雲錦照東郭清湍鳴迴溪綠水繞飛閣  
涼風日瀟洒幽客時憇泊五月思貂裘謂言秋霜落  
石蘿引古蔓岸筍開新籜吟翫空復情相思爾佳作



鄭公詩人秀逸韻宏寥廓何當一來遊  
慙我雪山諾

九日

今日雲景好水綠秋山明  
攜壺酌流霞  
奉菊泛寒榮  
地遠松石古風揚絃管清  
窺觴照歡顏  
獨笑還自傾  
落帽醉山月  
空歌懷友生

九月十日即事

昨日登高罷今朝更舉觴  
菊花何太苦遭此兩重陽

九日登山

淵明歸去來不與世相逐  
爲無杯中物遂偶本州牧  
因招白衣人笑酌黃花菊  
我來不得意虛過重陽時  
題輿何俊發遂結城南期  
築土按響山俯臨遠水湄  
胡人叫玉笛越女彈霜絲  
自作英王冑斯樂不可窺  
赤鯉湧琴高白龜道冰夷  
靈僊如彷彿莫酌遙相知  
古來登高人今復幾人在  
滄洲違宿諾明日猶可待  
連山似驚波合沓出溟海  
揚袂揮四座醅酌安所知  
齊歌送清揚起舞亂參差  
賓隨落葉散帽逐秋風吹  
別後登此臺願言長相思



秋夜與劉陽山泛宴喜亭池

明宰試舟楫張燈宴華池  
文招梁苑客歌動郢中兒  
月色望不盡空天交相宜  
令人欲泛海只待長風吹

泛沔州城南郎官湖 序載二十八卷

張公多逸興共泛沔城隅  
當時秋月好不減武昌都  
四坐醉清光為歡吉來無  
郎官愛此水因號郎官湖  
風流若未減名與此山俱

李翰林集卷第十八

李翰林集卷第十九

翰林供奉李白

雜詠

望廬山瀑布水二首

自溧水道哭王炎三首

嘲魯儒

白帝下江陵

懼讒

巫山枕障

口號吳王舞人半醉

魯東門觀刈蒲



望廬山五老峯

宿巫山下

過彭蠡湖

宣城見杜鵑花

白田馬上聞鶯

宿鰕湖

宿五松山下荀媪家

哭宣城善釀紀叟

紫藤樹

杜陵絕句

觀放白鷹

哭晁卿衡

白鷺鷥

下涇縣陵陽溪至澁灘

宣城哭蔣徵君華

秋下荊門

下陵陽沿高溪三門六刺灘

聽蜀僧濬彈琴

魯東門泛舟二首

宣城青溪二首

遊秋浦白筍陂二首

廬江主人婦



獨坐敬亭山

陪從祖濟南太守泛鵲山湖三首

遊南陽清冷泉

陪族叔刑部侍郎曄及中書賈舍人至遊洞庭

五首

鸚鵡洲

青溪半夜聞笛

望天門山

登太白峯

與謝良輔遊涇川陵巖寺

嵩山採菖蒲者

軍行

早望海邊霞

山中與幽人對酌

春日醉起言志

金陵聽韓侍御吹笛

與賈舍人於龍興寺剪落梧桐枝望滬湖

流夜郎聞酺不預

見野草中有名白頭翁者

從軍行

觀獵

觀胡人吹笛

夏日山中

與道者談玄作

上三峽

流夜郎題葵葉

金陵新亭

三五七言



雜詩

放後遇恩不露

題隨州紫陽先生壁

題元丹丘潁陽山居

洗脚亭

勞勞亭

題元丹丘山居

題嵩山逸人元丹丘山居

改九子山為九華山聯句

觀博平王志安少府山水粉圖

瑩禪師房觀山海圖

詠棹二首

白胡桃

題雍丘崔明府丹竈

求崔山人百丈崖瀑布圖

觀元丹丘坐巫山屏風

望廬山瀑布水二首

西登香爐峯南見瀑布水挂流三百丈噴壑數千里  
歛如飛電來隱若白虹起初驚河漢落半灑雲天裏

仰觀勢轉雄壯哉造化功海風吹不斷江月照還空  
空中亂濼射左右洗青壁飛珠散輕霞流沫拂一作

穹石而我遊名山對之心益閑無論漱瓊液且得洗  
塵顏一本無此二句且諧宿所好永願辭人間

日照香爐生紫烟遙看瀑布挂長川飛流直下三千  
尺疑是銀河落九天

自溧水道哭王炎三首宣州作



白楊雙行行白馬悲路傍晨興見曉月更似發雲陽  
溧水通吳關逝川去未央故人萬化盡閉骨茅山崗  
天上墜玉棺泉中掩龍章名飛日月上義與風雲翔  
逸氣竟莫展英圖俄夫傷楚國一老人來嗟龔勝亡  
有言不可道雪泣惜蘭芳

王公希代寶弃世一何早弔死不及哀殯宮已秋草  
悲來欲脫劍挂向何枝好哭向茅山雖未摧一生淚  
盡丹陽道

王家碧瑤樹一樹忽先摧海內故人泣天涯弔鶴來  
未成霖雨用先夫濟川材一罷廣陵散鳴琴更不開

嘲魯儒

魯叟談五經白髮死章句問以經濟策茫如墜煙霧  
足著遠遊履首戴方頂一作頭巾緩步從直道未行先  
起塵秦家丞相府不重褒衣人君非叔孫通與我本  
殊倫時事且未達歸耕汶水濱

白帝下江陵

朝辭白帝彩雲間千里江陵一日還兩岸猿聲啼不  
盡須臾過却萬重山

懼讒

二桃殺三士詎假劍如霜衆女妬蛾眉雙花竟春芳



魏姝信鄭衷掩袂對懷王一惑巧言子朱顏成死一作  
損傷行將泣團扇戚戚愁人腸

巫山枕障

巫山枕障畫高丘白帝城邊樹色秋朝雲夜入無行  
處巴水橫天更不流

口號吳王舞人半醉

風動荷花水殿香姑蘇臺上宴吳王西施醉舞嬌無  
力笑倚東窗白玉牀

魯東門觀刈蒲

魯國寒事早初霜刈渚蒲揮鎌若轉月拂水生連珠  
此草最可珍何必貴龍鬚織作玉牀席欣承清夜娛  
羅衣能再拂不畏素塵燕

望廬山五老峯

廬山東南五老峯青天削出金芙蓉九江秀色可攬  
結吾將此地巢雲松

宿巫山下

昨夜巫山下猿聲夢裏長桃花飛淥水三月下瞿塘  
雨色風吹去南行拂楚王高丘懷宋玉訪古一嚔裳

過彭蠡湖

謝公入彭蠡因此遊松門余方窺石鏡兼得窮江源



前賞迹可見後來道空存而欲繼風雅豈唯清心魂  
雲海方助興波濤何足論清嶂憶遙月綠蘿愁鳴猿  
水碧或可採金膏祕莫言余將振衣去羽化出囂煩

宣城見杜鵑花

蜀國曾聞子規鳥宣城還見杜鵑花一叫一迴腸一  
斷三春三月憶三巴

白田馬上聞鶯

黃鸝啄紫椹五月鳴桑枝我行不記日誤作陽春時  
蠶老客未歸白田已縹絲驅馬又前去捫心空自悲

一作

宿鰕湖

雞鳴發黃山暝投鰕湖宿白雨映寒山森森似銀竹  
提攜採鉉客結荷水邊沐半夜四天開星河爛人目  
明晨大樓去崗隴多屈伏當與持斧翁前溪伐雲木  
宿五松山下荀媪家

我宿五松下寂寥無所歡田家秋作苦鄰女夜春寒  
跪進凋葫飯月光明素盤令人慙漂母三謝不能餐  
哭宣城善釀紀叟

紀叟黃泉裏還應釀老春夜臺無曉日沽酒與何人

紫藤樹



紫藤挂雲木花蔓宜陽春密葉隱歌鳥香風留美人  
社陵絕句

南登杜陵上北望五陵間秋水明落日流光滅遠山  
觀放白鷹二首

八月邊風高胡鷹白錦毛孤飛一片雪百里見秋毫  
冬名十二月蒼鷹八九毛寄言燕雀莫相啗自  
有雲霄萬里高

哭晁卿衡

日本晁卿辭帝都征帆一片遶蓬壺明月不歸沈碧  
海白雲愁色滿蒼梧

白鷺鷥

白鷺下秋水孤飛如墜霜心閑且未去獨立沙洲傍

下涇縣陵陽溪至涇灘

宣州作

涇灘鳴嘈嘈兩山足猿狖白波若卷雪側石不容舸  
漁人與舟人撐折萬張篙

宣城哭蔣徵君華

敬亭埋玉樹知是蔣徵君安得相如卓仍餘封禪文  
池臺空有月詞賦舊凌雲獨挂延陵劍千秋在古墳

秋下荆門

霜落荆門江樹空布帆無恙挂秋風此行不為鱸魚



繪自愛名山入剡中

下陵陽沿高溪三門六剌灘

三門橫峻灘六剌走波瀾石驚虎伏起水狀龍縈盤  
何慙七里瀨使我欲垂竿

聽蜀僧濬彈琴

蜀僧抱綠綺西下峨眉峰為我一揮手如聽萬壑松  
客心洗流水餘響入霜鐘不覺碧山暮秋雲暗幾重

魯東門泛舟二首

日落沙明天倒開波搖石動水縈迴輕舟泛月尋溪  
轉疑是山陰雪後來

水作青龍盤石堤桃花夾岸魯門西若教月下乘舟  
去何處風流到剡溪

宣城青溪二首

青溪清我心水色異諸水借問新安江見底何如此  
人行明鏡中鳥度屏風裏向晚猩猩啼空悲遠遊子  
青溪勝桐廬水木有佳色山見日高古石容天傾側  
絲鳥昔未名白猿初相識不見同懷人對之空歎息

遊秋浦白苧陂二首

何處夜行好月明白苧陂山光搖積雪猿影挂寒枝  
但恐佳景晚小令歸棹移人來有清興及此有相思



白倚夜長嘯爽然溪谷寒魚龍動陂水處處生波瀾  
天借一明月飛來碧雲端故鄉不可見腸斷正西看

廬江主人婦

孔雀東飛何處栖廬江小吏仲卿妻為客裁縫君自  
見城烏獨宿夜空啼

獨坐敬亭山

衆鳥忽一作高飛盡孤雲獨去閑相看兩不厭只有敬亭山

陪從祖濟南太守泛鵲山湖三首

初謂鵲山近寧知湖水遙此行殊訪戴自可緩歸橈

又

湖闊數千里湖光搖碧山湖西正有月獨送李膺還

又

水入北湖去舟從南浦迴遙看鵲山轉却似送人來

遊南陽清冷泉

惜彼落日暮愛此寒泉清西輝逐流水蕩漾遊子情  
空歌望雲月曲盡長松聲

陪族叔刑部侍郎曄及中書賈舍人至遊洞庭看

洞庭西望楚江分水盡南天不見雲日落長沙秋色  
遠不知何處弔湘君

南湖秋水夜無煙耐可乘流直上天且就洞庭明月



色將船買酒白雲邊

洛陽才子謫湘川元禮同舟月下仙記得長安還欲  
笑不知何處是西天

洞庭湖西秋月輝瀟湘江北早鴻飛醉客滿船歌白  
紵不知霜露入秋衣

帝子瀟湘去不還空餘秋草洞庭間淡拂明湖開玉  
鏡丹青畫出是君山

鸚鵡洲

鸚鵡來過吳江水江上洲傳鸚鵡名鸚鵡西飛隴山  
去芳洲之樹何青青煙開蘭葉香風暖岸夾桃花錦  
浪生遷客此時徒極目長洲孤月向誰明

青溪半夜聞笛

羌笛梅花引吳溪隴水清寒山秋浦月腸斷玉關情

望天門山

天門中斷楚江開碧水東流直北迴兩岸青山相對  
出孤帆一片日邊來

登太白峰

西上太白峰夕陽窮登攀太白與我語爲我開天關  
願乘冷風去直出浮雲間舉手可近月前行若無山  
一別武功去何時復更還



與謝良輔遊涇川陵巖寺

乘君素舸泛涇西  
宛似雲門對若溪  
且從康樂尋山  
水何必東流入會稽

嵩山採菖蒲者

神人多古貌  
雙耳下垂肩  
嵩岳逢漢武  
疑是九疑仙  
我來採菖蒲  
服食可延年  
言終忽不見  
滅影入雲煙  
喻帝竟莫悟  
終歸茂陵田

觀獵

太守耀清威  
乘閒弄晚暉  
江沙橫獵騎  
山火遶行圍  
箭逐雲鴻落  
鷹隨月兔飛  
不知白日暮  
歡賞夜方歸

軍行

騶馬新跨白玉鞍  
戰罷沙場月色寒  
城頭鐵鼓聲猶  
震匣裏金刀血未乾

觀胡人吹笛

胡人吹玉笛  
一半是秦聲  
十月吳山曉  
梅花落敬亭  
愁聞出塞曲  
淚滿逐臣纓  
却望長安道  
空懷戀主情  
早望海邊霞

四明三千里  
朝起赤城霞  
日出紅光散  
分輝照雪崖  
一飡嘍瓊液  
五內發金沙  
舉手何所持  
青龍白虎車

夏日山中



懶搖白羽扇，裸袒青林中。  
脫巾挂石壁，露頂灑松風。  
山中與幽人對酌

兩人對酌山花開，一盃一盃復一盃。  
我醉欲眠卿且去，明朝有意抱琴來。

與道者談玄作

茫茫大夢中，唯我獨先覺。  
騰轉風火來，假合作容貌。  
滅除昏疑盡，領略入精要。  
澄慮觀此身，應得通寂照。  
朗悟前後際，始知金仙妙。  
喜逢禪居人，酌玉坐相召。  
彼我俱若喪，雲山豈殊調。  
清風生虛空，明月見談笑。  
浩然青蓮宮，永願恣遊眺。

春日醉起言志

處世若大夢，胡爲勞其生。  
所以終日醉，頽然卧前楹。  
覺來眄庭前，一鳥花間鳴。  
借問此何時，春風語流鶯。  
感之欲歎息，對酒還自傾。  
浩歌待明月，曲盡已忘情。

上三峽

巫山夾青天，巴水流若茲。  
巴水忽可盡，青天無到時。  
三朝上黃牛，三暮行太遲。  
三朝又三暮，不覺鬢成絲。

金陵聽韓侍御吹笛

韓公吹玉笛，侖儻流英音。  
風吹繞鍾山，萬壑皆龍吟。  
王子停鳳管，師襄掩瑤琴。  
餘響渡江去，天涯安可尋。



與賈舍人於龍興寺剪落梧桐枝望滄湖  
剪落青梧枝滄湖坐可窺雨洗秋山淨林光澹碧滋  
水閑明鏡轉雲繞畫屏移千古風流事名賢共此時  
流夜郎聞酺不預  
北闕聖人歌太康南冠君子竄遐荒漢酺聞奏鈞天  
樂願得風吹到夜郎

流夜郎題葵葉

慙君能衛足歎一作我遠移根白日如分照還歸守  
故園

見野草中有名白頭翁者

醉入田家去行歌荒野草一作中如何青草裏亦有白  
頭翁折取對明鏡宛將衰鬢同微方似相誚流恨向  
東風

金陵新亭

金陵風景好豪士集新亭舉目山河異偏傷周顛情  
四坐楚囚悲不憂社稷傾王公何慷慨千載仰雄名  
從軍行

百戰沙場碎鐵衣城南已合數重圍突營射殺呼延  
將獨領殘兵千騎歸

三五七言



秋風清秋月明落葉聚還散寒鴉棲復驚相思相見  
知何日此時此夜難為情

雜詩

白日與明月晝夜尚不閑况爾悠悠人安得久世間  
傳聞海水上乃有蓬萊山玉樹生綠葉靈仙每登攀  
一食注玄髮再食留紅顏吾欲從此去去之無時還

放後遇恩不霑

天作雲與雷霈然德澤開東風日本至白雉越裳來  
獨棄長沙國三年未許回何時入宣室更問洛陽才

題隨州紫陽先生壁

神農好長生風俗久已成復聞紫陽客早署丹臺名  
喘息煖妙氣步虛吟真聲道與古仙合心將元化并  
樓疑出蓬海鶴似飛玉京松雪牕外曉池水階下明  
忽耽笙歌樂頗失軒冕情終願惠金液提携凌太清

題元丹丘穎陽山居

丹丘家于穎陽新卜別業其地北倚馬嶺連峯嵩  
丘南瞻鹿臺極目汝海雲巖映鬱有佳致焉白從  
之遊故有此作

仙遊渡潁水訪隱同元君忽遺蒼生望獨與洪崖群  
卜地初晦跡興言且成文却顧北山斷前瞻南嶺分



遙通汝海月不隔嵩丘雲之子合逸趣而我欽清芬  
舉跡倚松石談笑迷朝曛益願狎青鳥拂衣棲江濱  
洗脚亭

勞勞亭

白道向姑熟洪亭臨道傍前有昔時井下有五丈牀  
樵女洗素足行人歇金裝西望白鷺洲蘆花似朝霜  
送君此時去回首淚成行

題元丹丘山居

故人棲東山自愛丘壑美青春卧空林白日猶不起

松風清襟袖石潭洗心耳羨君無紛喧高枕碧霞裏  
題嵩山逸人元丹丘山居

白父在廬霍元公近遊嵩山故交深情出處無間  
函信頻及許為主人欣然適會本意當冀長往不  
返欲便舉家就之兼書共遊因有此贈

家本紫雲山道風未淪落沉懷丹丘志冲賞歸寂寞  
竭來遊閩荒捫涉窮禹鑿黃緣泛潮海偃蹇陟廬霍  
憑雷躡天窓弄影憇霞閣且欣登眺美頗愜隱淪諾  
三山曠幽期四岳聊所托故人契嵩顙高義炳丹履  
滅跡遺紛囂終言本峯壑自矜林湍好不羨朝市樂



偶與真意并頓覺世情薄爾能折芳桂吾亦採蘭若  
拙妻好乘鸞嬌女愛飛鶴提携訪神仙從此鍊金藥

改九子山為九華山聯句 并序

青陽縣南有九子山山高數千丈上有九峯如蓮  
花按圖徵名無所依據太史公南遊畧而不書事  
絕古老之口復闕名賢之紀雖靈仙往復而賦詠  
罕聞予乃削其舊號加以九華之目時訪道江漢  
憇于夏侯迴之堂開簷岸幘坐眺松雪因與二三  
子聯句傳之將來

妙有分二氣靈山開九華李層標遏遲日半壁明朝

積雪曜陰壑飛流歆陽厓 韋權輿權 青熒玉樹色

縹緲羽人家李

觀博平王志安少府山水粉圖

粉壁為空天丹青狀江海游雲不知歸日見白鷗在  
博平真人王志安沉吟至此願掛冠松溪石磴帶秋  
色愁客思歸坐曉寒

瑩禪師房觀山海圖

真僧閉精宇滅跡含達觀列障圖雲山積峯入霄漢  
丹崖森在目清晝疑卷幔蓬壺來軒牕瀛海入几桉  
煙濤爭噴薄島嶼相凌亂征帆飄空中瀑水洒天半



崢嶸若可陟想像徒盈嘆香與真心冥遂諧靜者說  
如登赤城裏揭步滄洲畔即事能娛人從茲得消散

詠槿二首

園花笑芳年池草艷春色猶不如槿花嬋娟玉階側  
芬榮何天促零落在瞬息豈若瓊樹枝終歲長翕施  
世人種桃李皆在金張門攀折爭捷徑及此春風暄  
一朝天霜下榮耀難久存安知南山桂綠葉垂芳根  
清陰亦可託何惜樹君園

白胡桃

紅羅袖裏分明見白玉盤中看却無疑是老僧休念

誦腕前推下水晶珠

題雍丘崔明府丹竈

美人爲政本忘機服藥求仙事不違葉縣已泥丹竈  
畢瀛洲當伴赤松歸先師有訣神將助大聖無心火  
自飛九轉但能生羽翼雙鳧忽去定何依

求崔山人百丈崖瀑布圖

百丈素崖裂四山丹壁開龍潭中噴射晝夜生風雷  
但見瀑泉落如灑雲漢來聞君寫真圖崑嶼備縈迴  
石黛刷幽草曾青澤古苔幽絨儻相傳何必向天台  
觀元丹丘坐巫山屏風



昔遊三峽見巫山見畫巫山宛相似疑是天邊十二  
峯飛入君家綵屏裏寒松蕭颯如有聲陽臺微茫如  
有情錦衾瑤席何寂寂楚王神女徒盈盈高咫尺如  
千里翠屏丹崖粲如綺蒼蒼遠樹圍荆門歷歷行舟  
泛巴水水石潺湲萬壑分煙光草色俱氤氛溪花笑  
日何年發江客聽猿幾歲聞使人對此心緬邈疑入  
嵩丘夢綵雲

李翰林集卷第十九

李翰林集卷第二十

翰林供奉李白

閨情

寄遠十二首

長信宮

長門怨

示金陵女子

自代內贈

春怨

代贈遠



南流夜郎寄內

陌上贈美人

閨情

代別情人

代秋情

對酒

怨情

秋浦寄內

秋浦感主人歸鵝寄內

在潯陽非所寄內

送內尋廬山女道士李騰空二首

別內三首

巴女詞

湖邊採蓮婦

越女詞五首

怨情

浣沙石上女

長門怨

代寄情人楚詞體

笑歌行

悲歌行

草書歌行

姑熟十詠

代美人愁鏡二首

贈內

出妓金陵子呈盧六四首

贈段七娘

折荷有贈



寄遠十二首

三鳥別王母銜書來相見一作過腸斷若剪絃其如愁

思何此一本無遙知玉窻裏織手弄雲和奏曲有深意

青松交女蘿寫水落井中同泉豈殊波秦心與楚恨

皎皎為誰多

青樓何所在乃在碧雲中寶鏡挂秋水羅衣輕春風

新妝坐落日悵望金屏空念此送短書願曰雙飛鴻

一本青樓何所在作一首

遠憶巫山陽花明淥江暖躊躇未得往淚向南雲滿春

風復無情吹我夢魂斷不見眼中人天長音信短

本作一行書慙慙坐一作道相憶一行復一行滿紙情

何極瑤臺有黃鶴為報青樓人朱顏凋落盡白髮一

何新自知未應還一作未離居經三春桃李今若為

當窻發光彩莫使香風飄留與紅芳待

玉筋落春鏡坐愁湖陽水聞與陰麗華風煙接鄰里

青春已復過白日忽相催但恐荷花晚令人意已摧

相思不惜夢日夜向陽臺

陽臺隔楚水春草生黃河相思無日夜浩蕩若流一作

深波流一作深波向海去欲見終無因遙將一作持一點

淚遠寄如花人



妾在春陵東君居漢江島百里望花光往來成白道  
一爲雲雨別此地生秋草秋草秋蛾飛相思愁落輝  
何由一相見滅燭解羅衣

憶昨東園桃李花

一作紅

碧枝與君此時初別離金

瓶落井無消息令人行歎復坐思坐思

一本無下行坐思二字

歎成楚越春風玉顏畏銷歇

一本云楚越春風畏銷歇碧窻紛紛

下落花青樓寂寂空明月兩不見但相思空留

一本無此

二錦字表心素至今緘愁不忍窺

長短春草綠綠階如有情卷施心獨苦抽却死還生  
觀物知妾意希君種後庭閑時當採掇念此莫相

輕

魯縞如玉霜筆題月支書寄書白鸚鵡西海慰離居  
行數雖不多字字有委曲天末如見之開緘淚相續  
淚盡恨轉深千里同此心相思千萬里一書直千金  
美人在時花滿堂美人去後餘空牀牀中繡被卷不  
寢至今三載聞餘香香亦竟不滅人亦竟不來相思  
黃葉盡白露濕青苔

愛君芙蓉嬋娟之艷色若可飡兮難再得憐君冰玉  
清迥之明心情不極兮意已深朝共琅玕之綺食夜

同駕鴛鴦之錦衾恩情婉孌

此一本無二字

忽爲別使人莫錯



亂愁心亂愁心涕如雪寒燈厭夢魂欲絕覺來相思  
生白髮盈盈漢水若可越可惜凌波步羅襪美人美  
人兮歸去來莫作朝雲暮雨飛陽臺

長信宮

月皎昭陽殿霜清長信宮天行乘玉輦飛鷲與君同  
更有歡娛處承恩樂未窮誰憐團扇妾獨坐怨秋風

長門怨

天迴北斗挂西樓金屋無人螢火流月光欲到長門

殿別作深深一作一段愁

示金陵女子

金陵城東誰家子竊聽琴聲碧窻裏落花一片天上  
來隨人直渡西江水楚歌吳語嬌不成似能未能最  
有情謝公正要東山妓攜手林泉處處行

自代內贈

寶刀截一作流水無有斷絕時妾意逐君行纏綿亦

如之別來門前草春盡秋一作秋轉碧掃盡還更生

萋萋滿行跡鳴鳳始相一作得雄鷲各飛遊雲落

何山一往不見歸估客發大樓知君在秋浦梁苑空

錦衾陽臺夢行雨妾家三作相失勢去西秦猶有舊

歌管淒清聞四鄰曲度入紫雲啼無眼中人女弟爭



笑弄悲羞淚盈巾一本無妾似井底桃開花向誰笑

君如天上月不肯一迴照窺鏡不自識別多憔悴深

安得秦吉了為人道寸心

春怨

白馬金羈遼海東羅帷繡被卧春風落月低軒窺燭  
盡飛花入戶笑牀空

代贈遠

妾本洛陽人在夫陰一作幽燕客渴飲易水波由來多

感激胡馬西北馳香駿一作髮搖綠絲鳴鞭從此去逐

虜蕩邊陲昔去有好言不言久離別燕支多美女走

馬輕風雪見此不記人恩情雲雨絕帝流玉筋盡坐

恨金閨切織錦作短書腸隨迴紋結相思欲有寄恐

君不見察焚之揚其灰手跡自此滅

南流夜郎寄內

夜郎天外怨離居明月樓中音信疎北鴈春歸看欲

盡南來不得豫章書

陌上贈美人

駿馬驕行蹋落花垂鞭直拂五雲車美人一笑褰珠

箔遙指紅青一作樓是妾家

閨情



流水去絕國浮雲辭故關水或戀前浦雲猶歸舊山  
恨君流一作龍沙去棄妾漁陽間玉筋夜垂一作日夜流雙  
雙落朱顏黃鳥坐相悲綠楊誰更攀織錦心草草挑  
燈淚斑斑窺鏡不自識况乃狂夫還

代別情人

清水本不動桃花發岸傍桃花弄水色波蕩搖春光  
我悅子容豔子傾我文章風吹綠琴去曲度紫鴛鴦  
昔作一水魚今成兩枝鳥哀哀長雞鳴夜夜達五曉  
起折相思樹歸贈知寸心覆水不可收行雲難重尋  
天涯有度鳥莫絕瑤華音

代秋情

幾日相別離門前生穉葵寒蟬聒梧桐日夕長鳴悲  
白露濕螢火清霜零兔絲空掩紫羅袂一作空閨掩羅袂長  
啼無盡時

對酒

蒲萄酒金叵羅吳姬十五細馬馱青黛畫眉紅錦靴  
道字不正嬌唱歌玳瑁筵中一作上懷裏醉芙蓉帳底  
奈君何

怨情

新人如花雖可寵故人似玉猶來重花性飄揚不自



持玉心皎潔終不移故人昔新今尚故還見新人有  
故時請看陳后黃金屋寂寂珠簾生網絲

秋浦寄內

我今尋陽去辭家千里餘結荷倦一作水宿却寄大  
雷書雖不同辛苦愴離各自居我自入秋浦三年北  
信踈紅顏愁落盡白髮不能除有客自梁苑手攜五  
色魚開魚得錦字歸問我何如江山雖道阻意合不  
為殊

秋浦感主人歸鵲寄內

霜朽楚關木始知殺氣嚴寥寥金天廓婉婉綠紅潛  
胡鵲別主人雙雙語前簷三飛四迴顧欲去復相瞻  
豈不戀華屋終然謝珠簾我不及此鳥遠行歲已淹  
寄書道中歎淚下不能緘

在潯陽非所寄內

聞難知慟哭行啼入府中多君同蔡琰流淚請曹公  
知登吳章嶺昔與死無分崎嶇行石道外折入青雲  
相見若悲歎哀聲那可聞

送內尋廬山女道士李騰空二首

君尋騰空子應到碧山家水春雲母碓風拂石楠花  
若戀幽居好相邀弄紫霞



多君相門女學道愛神仙素手鞠青靄羅衣曳紫煙  
一徃屏風疊乘鸞著玉鞭

別內三首

王命三徵去未還明朝離別出吳關白玉高樓看不  
見相思須上望夫山

出門妻子強牽衣問我西行幾日歸一時儻佩黃金  
印莫見蘇秦不下機

翡翠爲樓金作梯誰人獨宿倚門啼夜泣一作寒燈  
連曉月行行淚盡楚關西

巴女詞

巴水急如箭巴船去若飛十月三千里郎行幾歲歸

湖邊採蓮婦

小姑織白紵未解將人語大嫂採芙蓉溪湖千萬重  
長兄行不在莫使外人逢願學秋胡婦貞心比古松

越女詞五首

長于吳兒女眉目艷星月履上足如霜不著鷓頭襪

又

吳兒多白皙好爲蕩舟劇賣眼擲春心折花調行客

又

耶溪採蓮女見客棹歌迴笑入荷花去佯羞不出一作



肯來

東陽素足女會稽素舸郎相看月未墮白地斷肝腸

又

鏡湖水如月耶溪女如雪新妝蕩新波光景兩奇絕

怨情

美人卷珠簾深坐顰蛾眉但見淚痕濕不知心恨誰

浣沙石上女

玉面耶溪女青蛾紅粉妝一雙金齒屐兩足白如霜

長門怨

桂殿長愁不記春黃金四屋起秋塵夜懸明鏡青天

上獨照長門宮裏人

代寄情人楚詞體

君不來兮徒蓄怨積思而孤吟雲陽一去已遠隔巫  
山淥水之沈沈留餘香兮染繡被夜欲寢兮愁人心  
朝馳余馬於青樓恍若空而夷猶浮雲深兮不得語  
却惆悵而懷憂使青鳥兮銜書恨獨宿兮傷離居何  
無情而兩絕夢雖往而交踈橫流涕而長嗟折芳洲  
之瑤華送飛鳥以極目怨夕陽之西斜願爲連根同  
死之秋草不作飛空之落花

笑歌行

天寶年中作



笑矣乎笑矣乎君不見曲如鉤古人知爾封公侯君  
不見直如絃古人知爾死道邊張儀所以只掉三寸  
舌蘇秦所以不墾二頃田笑矣乎笑矣乎君不見滄  
浪老人歌一曲還道滄浪濯吾足平生不解謀此身  
虛作離騷遣人讀笑矣乎笑矣乎趙有豫讓楚屈平  
賣身買得千年名巢由洗耳有何益夷齊餓死終無  
成君愛身後名我愛眼前酒飲酒眼前樂虛名何處  
有男兒窮通當有時曲腰向君君不知猛虎不看机  
上肉洪爐不鑄囊中錐笑矣乎笑矣乎甯武子朱買  
臣卽角行歌背負薪今日逢君君不識豈得不如佯狂人

### 悲歌行

悲來乎悲來乎主人有酒且莫斟聽我一曲悲來吟  
悲來不吟還不笑天下無人知我心君有數斗酒我  
有三尺琴琴鳴酒樂兩相得一杯不啻千鈞金悲來  
乎悲來乎天雖長地雖久金玉滿堂應不守富貴百  
年能幾何死生一度人皆有孤猿坐啼墳上月且須  
一盡杯中酒悲來乎悲來乎鳳鳥不至河無圖微子  
去之箕子奴漢帝不憶李將軍楚王放却屈大夫悲  
來乎悲來乎秦家李斯早追悔虛名撥向身之外范  
子何曾愛五湖功成名遂身自退劔是一夫用書能



知姓名惠施不肯千萬乘卜式未必窮一經還須黑  
頭取方伯莫謾白首爲儒生

草書歌行

少年上人號懷素草書天下稱獨步墨池飛出北溟  
魚筆鋒殺盡中山兔八月九月天氣涼酒徒辭客滿  
高堂牋麻素絹排數箱宣州石硯墨色光吾師醉後  
倚繩牀須臾掃盡數千張飄風驟雨驚颯颯落花飛  
雪何茫茫起來向壁不停手一行數字大如斗恍恍  
如聞神鬼驚時時只見龍蛇走左盤右感如驚電狀  
同楚漢相攻戰湖南七郡凡幾家家屏障書題遍

王逸少張伯英古來幾許浪得名張顛老死不足數  
我師此義不師古古來萬事貴天生何必要公孫大  
娘渾脫舞

東坡先生云太白集中有悲來乎笑矣乎及贈懷  
素草書數詩決非太白作蓋唐宋五代間學貫休  
齊已輩詩也余舊在富陽見國清院太白詩絕凡  
近過彭澤唐興院又見亦非是良由太白豪俊語  
不甚擇集中往往有臨時卒然之句故使妄庸敢  
爾若杜子美豈復有僞撰者耶

姑孰十詠



姑孰谿

愛此溪水閑乘流興無極漾楫怕鷗驚垂竿待魚食  
波翻曉霞影岸疊春山色何處浣紗人紅顏未相識

丹陽湖

湖與元氣連風波浩難止天外賈客歸雲間片帆起  
龜遊蓮葉上鳥宿蘆花裏少女棹輕舟歌聲逐流水

謝公宅

青山日將暝寂寞謝公宅竹裏無人聲池中虛月白  
荒庭衰草徧廢井蒼苔積惟有清風閑時時起泉石

凌歊臺

曠望登古臺臺高極人目疊嶂列遠空雜花間平陸  
閑雲入牕牖野翠生松竹欲覽碑上文苔侵豈堪讀

桓公井

桓公名已古廢井曾未竭石甃冷蒼苔寒泉湛孤月  
秋來桐暫落春至桃還發路遠人罕窺誰能見清澈

慈姥竹

野竹攢石生含煙映江島翠色落波深虛聲帶寒早  
龍吟曾未聽鳳曲吹應好不學蒲柳凋貞心常自保

望夫山

顯望臨碧空怨情感離別江草不知愁巖花但爭發



雲山萬重隔音信千里絕春去秋復來相思幾時歇  
牛渚磯

絕壁臨巨川連峯勢相向亂石流湍間迴波自成浪  
但驚群木秀莫測精靈狀更聽猿夜啼憂心醉江上

靈墟山

丁令辭世人拂衣向仙路伏鍊九丹成方隨五雲去  
松蘿蔽幽洞桃杏深隱處不知曾化鶴遼海歸幾度

天門山

迥出江上山雙峯自相對岸映松色寒石分浪花碎  
參差遠天際縹緲晴霞外落日舟去遙回首沈青翠

東坡先生云舟次姑孰堂下讀姑孰十詠怪其語  
淺近不類太白孫邈子思云吾聞之上平甫此李  
赤詩也赤見柳子厚集自比李白故名赤其後爲  
廁鬼所惑以死今觀其詩止於此而以太白自比  
則其人心疾已久矣豈廁鬼之罪耶

代美人愁鏡二首

明明金鵲鏡了了玉臺前拂拭交冰月光輝何  
清圓紅顏老昨日白髮多去年鈿粉坐相誤照  
來空悽然

美人贈此盤龍之寶鏡燭我金縷之羅衣時將



紅袖拂明月爲惜普照之餘輝影中金鵲飛不  
滅臺下青鸞思獨絕藁砧一別若箭弦去有日  
來無年狂風吹却妾心斷玉筋并墮菱花前

贈內

三百六日日日日醉如泥雖爲李白婦何異太常妻  
出妓金陵子呈盧六四首

安石東山三十春傲然携妓出風塵樓中見我  
金陵子何似陽臺雲雨人

南國新豐酒東山小妓歌對君君不樂花有柰  
愁何

東道煙霞主西江詩酒筵相逢不覺醉日墮歷  
陽川

小妓金陵歌楚聲家僮丹砂學鳳鳴我亦爲君  
飲清酒君心不肯向人傾

贈段七娘

羅鞵凌波生網塵那能得計訪情親千杯綠酒  
何辭醉一面紅裝惱殺人

折荷有贈

涉江翫秋水愛此紅蕖鮮攀荷弄其珠蕩漾不  
成圓佳人綵雲裏欲贈隔遠天相思無因見悵



望涼風前

李翰林集卷第二十

